



*Celadet Elî Bedirxan*

## Bilûra min a şîrîn

Bilûra min a şîrîn  
tu di sariya sibehê  
û hingûra êvarê de  
hevalê bêhevalan,  
destbirayê şivan û dilketiyan î.  
Dengê te  
hêstirên dilên xemgîran,  
silava ji hev-veqetiyan,  
girîn û zarîna dilketiyan  
tîne bîra min.  
bilûra min tu î,  
xemrevîna terkeserên dinyayê!

Dengê bilûra min,  
çiya û zozanên bilind,  
kaniyên bi gul û rihan dorgirtî,  
guhê şkeft û serê zinaran  
guhdarên te ne!  
û sira bayê xerbî  
te di nav pelên darê de digerîne.

Bilûra min, were emê  
bi wî çiyayê bilind re  
bi hewa kevin,  
û bibin cîranê bayên xurt

û hevalê kimtên wan  
yên bi mij û dûman,  
û tê de dengê xwe berdîn,  
û zarîna dengê me  
bikeve nav kortal û geliyan  
û bêcaniya erdên jêrîn  
bihejîne;  
û pêlên ava heftreng  
ên xemzebaz

nalîna me bigehîne  
deşta Sirûç û Diyarbêkrê;  
û beriya mêrxasên Berazan;  
û kalîna berxan  
tev şehîna hespan  
li me vegehrîn.

Bilûra min, binêre û bibihîze!  
Roj çû ava,  
stêra êvarê bû geş,  
kolosên çiyên ên gewr  
û hewranîyên wan ên sor û zêrîn  
bûne çûn;  
û pêlên ava şevê ên reş  
ketine deşt û newalan  
heta rûyê gir û kepezan.  
Di qeraca de  
kevir piyê şevgera dixapîn  
û bêdengiya şevê de  
pêjna lingên mêrxasan tê.

Bilûra min,  
dengê xwe berde!  
Dinya, mîna zarokekî berşîr,  
ket dergûşa xwe;  
Dengê xwe berde, bilûra min,  
û jê re bilorîne,  
xema wê birevîne!  
Bilûra min tu î.

Xemrevîna terkeseerên dinyayê;  
û li rohelatî  
dema ko dinya hişyar dibe  
ji xew radibe  
ji me re  
strana azadî û serbestiya  
Kurdistanê  
binehwirîne,  
û dengê wê stranê, bila,  
mîna tîrêjên rojê ên pak û zêrîn  
bikeve nav dil û guhên me.  
Bilûra min,  
Tu î xemrevîna dilketiyên welêt.